

gustav / January 01, 2015 09:01PM

[我於爾所大劫海中，自憶未曾於一念間不順佛教 ... 《大方廣佛華嚴經卷第三十九》](#)

◎ 我於爾所大劫海中，自憶未曾於一念間不順佛教。爾所劫中，未曾一念生瞋害心、我我所心、自他差別心。未曾一念離菩提心，於生死中起疲厭心、生下劣心、懷懶惰心、有障礙心、起迷惑心，唯住無上不可沮壞一切智性大菩提心。善男子，我普嚴淨一切佛土。我以大悲，救護眾生，教化成熟，令其清淨。我供養承事一切諸佛諸善知識，於彼諸佛善知識所，為求正法，弘宣護持，一切內外，悉皆能捨，乃至身命，亦無所吝。如是無量相應圓滿所行之行，一切劫海，說其因緣，劫海可盡，此不可盡。善男子，我法海中，無有一文一句，非是捨施轉輪王位而求得者、非是悉捨一切所有而求得者。善男子，我所求法，皆為救護一切眾生，念念相續，微細觀察，令最勝法速得現前，願以智光照明，開示一切世間，願為顯示出世間智，願令眾生悉得安樂，願普稱讚一切如來所有功德。我如是等往昔圓滿相應行門，於不可說不可說佛剎極微塵數劫海，說不可盡。是故，善男子，我以如是積集助道法力，增長諸善根力、廣大極深信力、修行諸功德力、如實觀察一切法力、成就一切智慧眼力、為諸如來所加持力、種種大願所引起力、無邊大悲不可動力、悉能清淨妙智通力、種種善友所攝受力，由此等故，得此究竟三世平等清淨法身，及得無上清淨色身，超諸世間，而隨眾生種種心樂，普為現形，入一切剎，遍一切處，普能隨順，示現神通，令諸眾生靡不欣樂。

~ 《大方廣佛華嚴經卷第三十九》 ， 罽賓國三藏般若奉 詔譯 ( [CBETA全文](#) )

---